

## ***Dai Sonetti Magliesi***

### LI PALLONI PATRIOTTICI

Don Tali, v'aggiu visti a llu curteu  
stu vintiquattru maggiu nevecentu  
sessantacinque, e ve ssicuru jeu,  
parìa na cosa bella, e stau cuntentu.

Anzi aggiu dittu intra lu gnignu meu,  
ca se ogni capustanza a stu cumentu  
nu penzava a llu sulu *magnusdeu*,  
ma ssia le feste a llu ccumpagnamentu,

la gente, ca ogni guerra v'ave visti  
alla viscija tutti ncalurati,  
tutti Diu e Patria, e tutti interventisti,

se riscurdaa ca siti riformati,  
e mo ca sciati rretu a lli bandisti,  
se cridia ca iti fatti li surdati.

NICOLA DE DONNO